

Baez Daih'it Ndaemnaz

上林县大丰镇皇周小学六(2)班 Banz Cezsiuh/盘哲霄

Aen sujgyaj neix gou ma ranzdaiq, cingq bungzdaengz seiz-nyaengq —— ndaemnaz. Maj baenz-neix hung, baez daih'it ndaemnaz, roxnyinh geizheih dangqmaz, angq-fwnghwng youh deq mbouj gib.

Gou caeuq daxdaiq daxmeh youq gwnz loh bae ndaw naz, dingqnyi sing dohlahgiy yiengj "hunghunghung" rauq naz, gou engqgya angq lo. Gou rap song aen gei, loh din byaij youq gwnz haenznaz ngutngeuj youh gaeb haenx, ca di laemx roengz naz boengzbut bae, gou cuengq aen gei, ienqhoij raixcaix.

"Haindu j bau gyaj lo!" Daxmeh hemq gou. Gou yaengyaeng yamq roengz naz bae, song ga sikhaek mboet roengz ndaw boengz bae, beng cungj beng mbouj hwnjdaej. Gou haenq-rengz diem song ga, hoeng gij namhboengz neix lumj raemxgyau 502 ityiengh, nem maenh song ga gou, hawj gou ning hix ning mbouj ndaej. Gou raen daxdaiq baenzneix geq hoeng byaij youq ndaw naz gig maenh, gou hix mbouj fug saw, "di boengz neix baenzlawz nanz ndaej gou ne?" Yienghneix siengj, gou yungh rengz baez beng ga couh ning ndaej lo.

Daxdaiq caeuq daxmeh ndwn youq ndaw naz, fwnghz riengjret daj buenzgyaj mbek ok go' gyaj, yungh rengz bau coh ndaw naz. Go' gyaj veh ok baenz diuz baenz diuz sienqbau

gyaeunde, doeklaeng onjmaenh cap youq ndaw naz. Yawj gyoengqde guh ndaej baenzneix ndei, yienghneix gou hag gij yiengh daxmeh dawz gyaj bau coh ndaw naz. Ngamq dingqnyi sing "bu" ndeu, raemx boengz couh sinz hwnj lwgda gou, baihnaj gou myox liux lo, gou couh yungh fwnghz uet lwgda, caiq yawj geij go gyaj gou bau haenx, ngeng bae ngeng dauq, lumj caeuq gou doxdingj nei ninz youq ndaw naz, lij comz doxcaez dem.

Daxdaiq riu lo, gvaqdaej son gou: "Gaej yungh rengz lai, baez go bau, genfwnghz yungh rengz aeu yinz, gyaj cij ndaej 'ndwn' maenh." Lij daegdingh daengq gou, go' gyaj doxliz gaiq din ndeu cei q habngamj. Gou rox aen fuengfap neix, angq raixcaix, go cieq go bau bae, hoeng youh lumz daengq ga, ndigah song ga mboet roengz boengz bae gig laeg, boengz dumh gvaq gyauejhoq lo, ga beng mbouj okdaej, gou cijndaej heuh daxdaiq caeuq daxmeh bang gou. Hoeng gyoengqde cij goq bau gyaj mbouj leix gou, gou mboujguenj sam caet ngeihcib'it couh yungh rengz beng ga, siengj mbouj daengz yungh rengz gvaqbouh, "ba" sing ndeu, caekhaex naengh roengz boengz bae. Caj gou cengq dwk ndwn hwnjdaej seiz, daengx ndang gaeng baenz duz lingzboengz iq ndeu lo. Daxdaiq caeuq daxmeh raen le cungj riuhaha.



Daengngoeng lumj feiz nei cik dou, mbouj miz saek di rumz, "naengj" dwk gou hanh lae hanh roenx, hanh daj najbyak ndik haeuj ndaw da bae, da yawj mbouj raen baihnaj, gou bibi gyauej, fid hanh bae, yaep ndeu, hanh youh ndik haeuj ndaw da, gou mbouj goq fwnghz uq boengz, song fwnghz cigsoh bae uet hanh, mbouj rox seizlawz, naj gou cungj uq boengz liux lo.

Gig mbouj yungzheih bau ndaej buenz gyaj ndeu, "baeg lai lo, gou yaek baeg dai lo." Gou gag gangj gag naeuz, gou hojlien dwk muengh daxmeh, daxmeh da daengx gou bat ndeu, gou cijndei youh laebdaeb bau

gyaj. "Byawz rox haeux ndaw buenz, naednaed cungj sinhoj." Coenz vah neix mbouj loek ha! Doeklaeng, daxdaiq gangj ndaej ma ranz lo, gou lumj ndaej gejcuengq nei diem ga couh buet.

Banhaemh, gou ninz youq gwnz congz, din fwnghz in youh maz. Ndaemnaz —— gienh saeh baez yawj gig soeng gig yungzheih ndeu, cix aeu ok baenzlaiz rengz caeuq hanh. Gou roxdaengz le nungzminz baengh rengz ndaemnaz gwn haeux dwgrengz lai, daj neix hwnj gou caiq hix mbouj gamj luenh saisaengq haeuxgwn lo.

(boux lauxsae son'gyauq: Vangz Gveiyangh)

Gou Gyaiez Daxboh

Daxboh lumj aenranz yienghneix hung, ndwn youq henz de gou roxnyinh gig an'onj. Hoeng mwh daxboh caeuq gou guhcaemz cix lumj lwngyez nei, guhcaemz ndaej beij gou lij ak. Daxboh lumj roeggyaeujmeuz yienghneix coengmingz, hoeng miz seiz hix guh di saeh huk, lumj mwh cau j byaek miz seiz dawz dangz dangqguh gyu.

Daxboh gig miz naihsim, mwh gou guh saeh guh daengz buenq couh mbouj siengj guh, de cungj hawj gou aen umjgyaez ndeu, lij naihsim son gou. Baez daengz ngoenzsinghiz, daxboh cungj son gou gwih danci. Ngamq hainduj, gou cungj hag mbouj rox, gyauejci gaem mbouj cingq, mwh gwih cungj ngut bae ngut dauq, gyauejhoq lij deng bungq sieng dem. Gou miz di doeknaiq, mbouj siengj hag lo, daxboh cungj vah naek cingz laeg doiq gou naeuz: "Laemx le caiq benz hwnjdaej, mboujduenh sawq de, cij hag ndaej rox." Dingq gij vah daxboh le, gou youh mbeihung laebdaeb hag, daxboh couh youq henz dang "bouxson": "Daih'it aeu gaem



gyaeujci cingq, da yawj baihnaj, gaej cungj yawj gaiq dabdin." Ginggvaq geij baez laemxlaemx bungqbungq, gou dauqdaej hag rox gwih danci lo. Gou angq dwk coemj haeuj ndaw rungj daxboh bae.

Neix couh dwg daxboh gou. Daxboh gou gyaiez mwngz.

(it nienzgaep Yauz Cih)

Nywjdoengh

Beixmbauq ha, mwngz vihmaz giemz gosoemjmeiq gou ndaem de bae ne?

Boh mbouj dwg naeuz gvaq, yaek youq suen va baihnaj ranz de ndaem haujlai haujlai va, hawj gak cungj gak yiengh va nauhnauh yiedyied hailangh ma?

Mwngz naeuz: Gosoemjmeiq dwg go nywjdoengh gwnz bya ndwi.

Hoeng, beixmbauq ha, gou ndaem de youq ndaw suen va, de couh mbouj dwg nywjdoengh lugo. Gou lij youq gwnz bya raen gvaq, gij va de lij hung gvaq va haijdangz mwngz ndaem de bw, lij lai ndeiyawj bw, lij lai dwggvaez bw.

Mwngz naeuz: Mbouj caengz miz bouxlawz youq ndaw suen va ndaem gosoemjmeiq nauq.

Hoeng, beixmbauq ha, gou ndaem le, mbouj dwg couh miz vnz youq ndaw suen va ndaem gosoemjmeiq gvaq luma?

Langhnaeuz mwngz mbouj giemz de bae, daengzlaeng langhnaeuz lij miz vnz naeuz——mbouj caengz miz bouxlawz youq ndaw suen va ndaem gosoemjmeiq gvaq! ——nyaenx couh dwgriu lai lo!

(Daj 《Bonjsei Sim Lwngyez》 (Veiz Gizlinz raiz) senj okdaej, Lwg-fwnghzmeih/卢奋长 hoiz)

